

غاب القمر

مجدى نجيب



المركز للنشر والتوزيع

٢٠٠٨

(لا تمنع الخير عن أهله حين يكون في طاقة
يدك أن تفعله).

أمثال - الأصحاح الثالث -

غاب القمر



دار نفرو للنشر والتوزيع

الإشراف العام : محمد الحسيني

المراسلات :

٢١ ش الصناديل بالجيزة

١٧ ش العطار بالجيزة

ت : ٢٥٧١٣٦١٨

موبايل : ٠١٠٢٢١٢٥٧٩

الموقع الإلكتروني :

www.darnefro.com

البريد الإلكتروني :

dar_nevro@hotmail.com

جمهورية مصر العربية

اسم الكتاب : غاب القمر

اسم المؤلف : مجدى نجيب

رقم الإيداع : ٢٥٦٤١ / ٢٠٠٧

الترقيم الدولي : X-42-6196-977

تصميم الغلاف : كامل جرافيك

جمع إلكتروني : سوفت أيماج

حقوق الطبع محفوظة

الطبعة الأولى

٢٠٠٨

لايسمح بإعادة إصدار هذا الكتاب أو أى
جزء منه أو تجزئته فى نطاق استعادة
المعلومات ، أو نقله بأى شكل من الأشكال ،
دون إذن خطى مسبق من الناشر .

فى الحب ... والحكمة

إلصاحب ببيان عن رنة صوتة
إللى يجازي الخير بالشر يجز الحزن لبيته

إللى يعلى ف بابہ صحابه تبعد عنه وتبكي عينيه
إللى لسانه بيتقلب .. يقرب شره عليه

من يشهد زور ما يزوره ..
غير الكذب في زوره .

إفتح عينك زى الوردہ
وافرد قلبك نهر هوذہ

راح تشبع خبز ويشبع جيلك،
ويجيك ناس طالبين الحكمه

اللي يسد ودانه
عن حزن جيرانه
عن صرخه واحد مشتاق للكلمه
ح تسد ودانه دموع أحزانه

من يحفظ في القلب الكلمه.. يبعد عن قلبه الضيقه
الكلمه اللي بتضحك .. تقدر تمسح بيها حريقه

إلى بيعصر روح الكلمه يموت عطشان
الأحزان..
حدوته جديده خلقها الإنسان

اللعنه بدون أسباب ما تجيش
اللى بيحمل ذل ما عمره يعيش

الكلمات

الكلمه ف يوم ما كانتش جبانه
كانت (جبانه) ودفعت كل الكذب
ما كانتش السجانه ..
عاشت أم وموال للحب
الكلمه .. دائماً إنسانه
تاخذ بإدين الفقرا

الكلمه .. دائماً إنسانه
سمرا .. بيضاء .. زنجيه،
ما تخافش الريح
وتحب الحريه

تفرد ضحكتها ..
وتغطى المجاريح
وتتقرع الشبابيك غنوتها
الكلمه ..
سمرا .. بيضاء .. زنجيه
هيا الحريه

الكلمه هاجرنا معاها وهاجرت وئانا
جيناها ..
من تحت الفاس
م الناس
م الصعب ومن عرق السكه
م الرقه
م القسمه الفارده دراعها شراع ع النيل

سمرا.. بيضا .. زنجيه
الكلمه ..
هيا الحريه

راجل غريب كان يحلم بالمستقبل

فيضان الزفت
فيضان الناس اللي بيحرف ناس
ومداس بيواسى ف رقه الأسفلت
وميدان من غير تمثال
ومآذن يَدَن فوقها الحرف الدجال
ونا لسه ما شيت
زى الفريره بافر ايامى واخبي الموال
من خوفى سكت.

دبلت عين الشمس على كتافى
دبلت رمانة الفضة ف صدر الليل البردان
واتدلت عناقيد العنب الاسود
بدل الرمان!؟

الليلة ..

هجم الحزن على خدود التوت

دخل الحزن بيوت

شال الرعب النبوت

خلّى الدنيا سكوت

الضل معرّش ع العين

ورموشي مراكب بتعدي وسط الدمع

قنديل القلب جزم بتدوب م المشي يوماتي .

علي ضهري النقش مسله

باتسلى بطعم شعاع من ديش

واتسلى بطعم الشمس

والحر يفبرك حوادث الموت

امبارح .. طرّفوا الأبواب
والقمر الأزرق غاب
والنجم الأصفر داب
والمستقبل سيّـل رمشه وشاب
الليلة الأسفلت ح يشرب دمع
والقطط السوداء ح تاكل لحم الميت
والكلب الأعرج ح يعني الصفح

الربيع

-١-

قلبي اللي ما نزلش الجنائن كان بيحلم بالربيع
لكن ما جاشي
يا ما كان مسيره بصير رماد ويدوس عليه ..
كل اللي يسوي أو ما ينواشي
ويموت بلا كلمه بتواسي
ولا تبوسه ع الهوى الماشي
قلبي اللي مائزلش الجنائن
نزل الجنائن هسّ .. هس وهش أحزان المداين

-٢-

غسل المطر جسم السنه الأزرق
لبسها فستانه المرطب وزقزق
ولما طبطب فوق ضلوعها
الآهه بانّت وطلت
والكلمه مطت دراعها .. وغنّت
وحكايه الفارس المأسور على جبل الجراح
طالت .. وكبرت
ونسمة فوق حنك الطريق
صرخت .. ودبلت

- ٣ -

عاد النسيم أعياد
لكن الورد الصغير
اتكحل السنه دي بالرماد
عاد النسيم وكأنه راجع سندباد
بيدور على حلم متغور
والليلادى لقوه بيبكى ع الشفاف
وبيبكى فوق خد الولاد

- ٤ -

واحد م البشر خالق سفينه من الورق
راكب جناح الريح وسيفه من العرق
لف المدينه كلها
طاف الجنائن كلها
لاجل يقطف زهرة الصبح لحبيبته
ويجيب لها عقد من النجوم يرقص على صدرها
فى نهاية الرحله الغربيه ..
لقيوه قتيل فى حضنها

- ٥ -

الأمل عايد جديد
مغسول بدمعي بالمطر نازل ع البشر بوسه
يغسل شبابيك الإزاز والبزاز والكلام تانى
عاد الأمل تانى
راجع بلا أوتاد وحيانى
شال من على اكتافه رداء الدم واتبسم
يا هلترى بسمه استهزاء
ولاً الألم من كتره ما يبانشى؟!

كلمات منسية من شوارع القاهرة

شفت الهدوم سوده
محنّيه بتصلّى
شفت القمر خايف
وفوق شفايف قلبى واصل لى
والورد لاحمر ع النهار نوح
طمني يا خلّى
امتى ح يطلع صبح
امتى .. واشوف ضلّى

ماشي طابور الحزن بيغنى
ماشي الطابور بيلف
حوالين ميدان واسع بلا تمثال
ماشي الطابور للخلف
أعلامه شمس عيونها معصوبه
ونجومها مصلوبه
والرعب في الننى
بيقول لى كيف الحال
طمنى !

المطربه المشهوره قالت :آه
آه م الليالى يا ليل
وف بقعه منسيه
جت له الرصاصه ف عين
طلع المغنى بالباروكه يغنى
وشارع الحريه كان مستنى

فيه الهدوم السودا بتصلّى
حتى الهدوم يارب
لو عيني نامت ما نام القلب
وجراحي نيرانها ما بتخلّى
لسه الكلام إياه !

التوب فى قلب الباترينات نايم
إكمنه مستورد
نايم بيحلم بالشموع والعه
وبجسم لّين م النسيم بيرد
وف حتة فيها الليل كأنه قبر
سهران بنى آدم سلاحه ف إيدّه
سهران ونفسه يدوق عنا قيده
يدوق حلاوة النصر
ويقول يا متولى ..
فى حبها هايم !

يا هلترى الأحزان لو تكثر

بتخلّى فستان البنات يقصر
بتتور البتارين ؟
الحزن نسانى السؤال
- مين اللي داخل فى المطار ديك رومى
وكأنه بيقول للقيامه قومى !
- ازاي ما تعرفش ؟
وف كل شارع له أثر باين
في الباترينات وف حلة المحشى
مين اللي داخل ع المطار مرعوش
وكأنه داخل سجن
- إزاي ما تعرفهوش ؟

دا صعيدى جاى يعرق وياكلها
مخلوطه بالرمل اللى طالع نازل
شايئه على كتافه صعيدى وفاعل
جرى ايه بقى ...
ما تفوقوا يا رجالها
يا زرع متنتور
إمتى ح بيرق برق
وبيان جنوب من شرق
إمتى ح تطلع شمس
وانسى لىالى الهمس
واسأل ويا عيني .. السؤال يكبر

تراثيل .. من غير مغنى

كان نفسى أكتب لك من مده
وأحكى لك ،
عن أحزان الليل الشارده
عن أحزان الورده
عن أنهار الحيره
عن نجمه ضريره
عن قمرى المخنوق
فى الأوضه البارده
عن دمعات الخلق
عن كلمات بتموت وتعيش فى الحلق
عن وردات دبلها الشوق

الليله قابلت المستقبل فى الشارع
كان ماشى يعيط عريان
مضروب بعيار من نار
ماشى المستقبل ماشى بيحلم بالتار
تايه وسط الرعب وبين عجالات الترمای
كان لونه بلون شفايفنا المخضوضه
كان زى الإنسان
وَحْدَانِي ف ضل الأحزان

صرخ الراديو بأخبار
ضحك القلب المحتار

فرحت كل مراكبي
سارت مش خافيه ..
رعب الأعصار

وسط الزحمة لمحت عيونك بتصلي لصمت
الشارع
بتصلي لحبه رمل دايسها القدم الاسود
بتقرهد لكن بتحاول .. تصمد
بتصلي لكل التايهين
بتصلي لكل الغربا
وتوصل ضلي العرقان م الخوف
وتقول لي أيا منا الصعبه :
ح تهون في الصبح الطالع

علشانك

علشانك

علشان القمر المتزوق ما هو عارفك
علشان القمر اللي بيضحك في شفافيك

علشان

أفراحك صبحت أفراحي
أحلامك غطت لي جراحي
علشانك..

نسيت الدنيا كلام الحزن
ورسمت الحب ف حضن الحضن

١٩٦٤

يا قضبان الورق الليلي
يا قضبان الصمت فى مدخل حزنى الشتوى
عصافير الكلمات بتزفرق وتمزق..
سجنى الورقى
وبتحرق ضلى
جنب مدينه ف شتويه خوفها بتعوى تملئ .
وتملى
ضلى الخايف جنب جدار بيصلئ
بيصلئ لكل الناس

دراعتنا إله

مش عايزنا نغنى
غير بس شجن
ويخافوا مواويلنا المبدوره بحب
بيخافوا تشب وتبقى رايات ومكن
بيخافوا غنوة برق ف بق الشعب
لكن ح نغني لزماناً ولكل زمن
ونشب لهب
وطابور م الريح فى غيطان الشر
ونعدى محن

ونصيد النجمه ونزرعها ..
تطرح تمر
حنقول أغانيها ف وش الرعد
ونعوم في بحور الصهد
ونبارز صمت الخوف والقهر
ونجرح أى سحابه ما تمطر ورد
وح نبني ف كل عيوناً شمس
ما تخاف من حد

مش عايزينا نغنى
غير بس وصوتنا جريح
إحنا اللي غيطانا سنابل ريح
والأرض بلون البرق
ودراعنا إله للحق

رسائل فاقدة الوعي

- ١ -

أندهلك .. ولأ اكتب إسمك .. ولأ ارسم وردة!!

لو كنت صحيح رسام

أنا كنت رسمتك نجمه ف حضن الكراسه البيضاء

ورسمتك شمس تدفى الورد البسام

ورسمتك قمرًا تبعد ضل الأيام السودا

لو كنت صحيح ملاح

أنا كنت رسمتك بحر من الأفراح..

والموجه ..

ضحكايه

وحكايه

وحدوته بتشرب .. دمع التفاح

- ٢ -

بانتقلب فى سريرى
الناموسيه رخام وأنا قلبى حريرى
شوفتيش الغربه ..؟!
شرايين القلب بتسكر فوق الأسفلت
والغنوه ف آخر الليل لقيوها الناس ..
مقتوله ف أوتوبيس
باستغرب
إزاي الواحد يقعد يرضع وحده الحواديت
ويغنى لنفسه لحد ما يجى قصاده الموت ؟!

-٣-

رُحَت السبِما

كان طرزان بينادى لشيتا ..

وأفريقى بيصرخ م الخوف

لكن "ريتا"

كانت مشغولة بتقشير الخوخ

وهنود بديول أشكال واللوان

ورصاص بيظير، تتحول كل هنود الدنيا لورقة

صفصاف

أنا كنت بأفكر أعمل إيه
إيه يعمل إنسان القرن العشرين ؟!
مفتوح العين
مقفول العين
يقعدع القهوة
ولاً يَلَوْن بالحب الغنوه
ولاً يحط ف حنكه قفلين
ولاً يخلّى تخزين الحزن بفيض على كل سنين
إستورد بعض رجالنا التقاليع
عملوا ف بعض التدليع
واتحول شارع سليمان السهران
ريح ف خد الأحزان
مرقص فيه الشجعان شخايل غاويه تشخايع
أما ما يحكى عن بعض النساءوين
فحكايه عايزه .. دواوين ؟!..

الساعة $\frac{1}{4}$ ٨

مش صدفة إنك منصوف للنص

أو إنك معوج الرص

أو إنك بتحب الرقص

أو إنك مركون ع الرف

أو إنك محجوز فى الصف

مش صدفة ..

أنا عمرى ما شيل فى دراعى زمن

ولا عمرى أشيل فى شراعى أفندى منشى

والكلمه أقولها .. تمشى ..

وتروحك على نسمة قطيفه

لكن ..

خايف ما تعيشى

قلبى زى البحر

والخنجر ما يأثرش

ونا قلبى ف أيدي بيرعش رعش

زى العيل
باتأمل خوفى وخوفى بيتأمل،
فيا واتخيل
نهذ الدنيا بالونه وطعم رغيف

ع الشط التانى الناس بتصلى
علشان الجرنان الصبحه يقول :
الناس ..
أكبر م خوف

-٥-

عيني بتقدر تلضم خيط الشمس
ووداني بتكره طعم الهمس
لكن شفت الراجل إياه ..
اللى بيقد في القهوه يغنى لنفسه
يشرب شايه الميزه ويقرا الجرنان .

- ولا حاجه يا عم جديده
ما زحفش السود على حي البيض
الريح ما لمسشى شعور الشمس
الراجل بيغنى لنفسه
ويرطب عمره بمانشيت الجرنان
"أفريقيا بتولد ناس"
عالم تايه فى الغربه
ونا قاعد فى ميدان التحرير
يسكرنى طعم الخوف
وبفوق على صوت التحرير
قاعد فى الضل على الكرسي
وف ايدى سيجاره
باستغرب ..
ازاى الناس بتموت فى بلاد الناس !؟

الصباح شربت الشاي ع القهوة
وقريت الجرنان
ولا حاجه ياعم جديده
الناس بتموت فى بلاد الناس
والملك الأسود مات
دبحوا كمنجة نوح وغرايه الأسود هج
إعلان: إنسان أصغر للبيع
طوابير الصليبان بتدق الأسفلت
طوابير الحزن الغلبان
طوابير السهد الأحمر متكحل على كل رصيف
٣٥ بالقرش وح اخذك ضيف
ونطفى النور السهران
ونصحى القلب العطشان
أحزان الانسان قدام باترينه .
عليه بلومونت
أنا شفت كتير وما شفت :
ازاى الواحد يقعد يرضع وحده الحواديت ؟

مونولوج راجل له ذكرى حزينه

كان مالي جناحه بأحزان
كان بيغنى لنفسه أمانه .. أمانه .. أمان
ويداعب نجمايه أسيرة إنسان
لو كان
لو كان
لو كان
آه يا حبيبتى .. آه لو كان

كل العصافير بتشيل الخوف
عرفت طعمه وطارت بحنكها المليان
لو كان
لو كان
لو كان
طارت بتمرجح أغانيها
على حبل الريح
تحذف منقارها ف صدر الرمان
والدم عيونا المليانه جروح
والريح يقول :
لو كان
لو كان
لو كان
آه يا حبيبتي .. آه لو كان

فى اللئل المتنفسج با حلم
إنى عصاره ضوء مثألم
أو إن الدنيا ف غاره
وبأن الأيام الحلوه اتحبست فى مغاره
- إزرع حبه قمح
واترك للدنيا الجرح
- " وإن شح القمح ف يوم ؟!
- إن شح ..
ما تفكرش الأزمه تدوم
لما الريح بيهب ويمسح راسه فى سفح الجرح
إحنى دماغك وأقرا ف سرك مكتوب العصر،
الخوف
- لكن ؟..
قتلوا الغنوه ف ضلعه
والصبار اتزرع ف عينيه
- إحنا بنقدر نكدب
ما يجركش وراه البرق اللى ف راسه وجرح
- والله زرعت القمح

- عارفك
ح تشاور ع المصاليب فى غيطان القمح
- والعمر
- إبعد عنى وزيرك لاسود
طلع لى المهر
- آه كانت رحله جميله وف جزيره ..
لسه فاكرها .. كانت ساعة عصر
بايدينا داهيا زرعنا التفاح
- ما تفكرنيش بالوهم بالمفروش ساجيد ع
الأرض
- لما قدرنا ف يوم قدما نصاص القلب
لأجل حب
وملينا الدنيا بأفراح
- وصاحينا ...
كان مالى جناحه بأحزان
كان بيغنى لنفسه أمانه .. أمانه .. أمان
ويداعب نجمايه أسيرة إنسان
لو كان .. لو كان .. لو كان
آه يا حبيبتي .. آه لو كان

- إلعب ..
- ح تطب ..
- أخبار .. أهرام .. إلـ ..
- آه لو كان فى الضل
- آه لو قلبى ينام فى الضل
- لو كان ح يهل هلال ع التل
- إيه . ما قرئتش جرايد الصبح
- ما لمستش بعينيك الجرح
- الحرف ما عادش سلاح
- ولقوه مقتول متغطى بأحلام الناس
- كل الأبواب متقويه
- زى هدم الستات
- زى نهاية الحكايات
- جنابنا بيخجل يطلع فيها الورد
- وقلوبنا .. دبلت فيها حروف الود
- كش
- حرك فرسك
- مش قلناك .. !؟

ليلة سبعة وعشرين

الموت بيغنى

وكمنجه بألف دراع اتمطع فوقها اللحن

والبرج

واقف تحته باصيد القمر

- أحمر ..

وقّف ..!؟

- أخضر

عدّى

- أصفر

هدّى ..

هدى شويه

مش قلنا لك

- إمسح عرقك

- ح يرقى

إفتح عينك

- سيب القمر

- مجنون .. مجنون
بيقول الكلمه ندوسها تهون
ونخون ما نخونش آخرها سجون
بيقول العصافير
راح تدخل كل جنينه وتلقط حب الرمان
- الإسود
إلفيل الإسود
والفيل الابيض
بيلف الرقعه لوحده
إمبارح
كان عيد الوحده
- بتقول إن كان راح يرضى...
مش ح ارضى.
- لو كان راح تيجى العصر
وقبل ما ييجى الليل اتسلق سلم قلبي ايام
الحب
واقطف ليها الفجر
لو كان
لو كان

لو كان
لو كان يا حبيبتى .. آه لو كان مش عجز

وصبر .

- إيه ذنبى

- قتلوه امبارح فى الأوضه البارده

- آخرتها

- ديتها الفارس ح يحرك فرسه ويتبعنى

ويلف الدنيا جوه كتاب

راح يقطف كل سحاب

ويغنى أناشيد العوده

راجع والريح أصحاب

- لأ .. لو تتبع فارس ح تموت

صدقنى

أنا مره وبس .. !؟

- ليه كلمة بس

عندك حق

كلمات الحب قالوها الناس واتداروا ف شق

سرداب الحب دفا

وأجمل كلمه تموت على نفس البق

أنا قلبي وفا

من تاني ح نرغى ومن تاني نبص .

- طب كان لازم يـ ...

- كش

- كان فارس

- كان يركب أجدع مهره

ويبارز صمت الخوف

- ويصيد النجمه بطلقه حرف

ويغنى لصمت البحر ، يفور

ويعدى كل كلامه السور

ويدفئ .. يطمئن زى النور .

- آه احنا فى عصر الصواريخ

إوعاك تخرج م الصف

- قلبي بيلوى شفايفه

صاحبى مقتول ونا شايفه

مش قادر أخرج م الصف

- إتفرج على قلب رمادى الضحكه

إنفجر قول يا سلام
كان صاحبه ببزرع أحلام
واهو تاه فى عيون السكه
- قلبى بيلوى شفايفه الممدوده
بطنى بتحضن كفى العطشان
حلقى قضبان سجان
وف حنجرتى المسدوده
مخزن للأحزان.
- إيه الصور السريالى داهيا . !?
- كان إنسان.
- كاس كونياك ..
أكثر م الرقه
زى نسيم العصر بيعوج رمشه ف رقه
عاوجه رقابتك .. بتغنى .. لسه
لسه العشاق مساهير
لسه ف عصر الصواريخ
لسه بتقدر كلمه تدق المسامير

لسه بتقدر كلمه تزيف طعم العيش
لسه كل المشاهير
شاربين كونياك الأحزان
لا بسين الأحمر والریش.
- نظرة عینی بتحمل حزن مدينتی ف ليلة
صيف

لو عايزه تشوفی البحر
لازم تاخدى دروس فى الخوف ؟!
على كل جدار
على أى جدار
ضل بيتمدد بيجاول تانى وينهار
على كل جدار
قلب نهار
مطعون بالخوف.. والخوف فى عیونا احتار
مش عارف ..
هل هوّه صحيح بيخوف
ولاً حكايات الشجعان
بس بتتقال
فوق ضلع الأوتار.

وافرد راسى ف وش الكوبرى

قلبي بيلوى شفايفه الخايفه

يمكن أصطاد الموج

- إيه الصور السريالى .

كش .. ؟!

كش العصفور على فرع الرمان

لو كان

لو كان

لو كان

لو كان يا حبيبتي .. آه لو كان

كان بطل يلعب بشفايفه

كان بطل يطرد من قلبه السقعه

البرد بيكبر ويا الحب

وكابوس فى عيون الخلق

كانت قاعده قصاى بترقص فى عنبها الوحده

أول مايو

كانت أول غنوه لأول عامل

كان واحد
كان نايم يحلم وف قلبه بتمشى الشمس
وباريس كات عيل واحد
كات كل الطيقه
أسبانيا بتولد فى السر الأشعار
وتقدمها ف صحن عليه نهدين فى بالدم
الكتب الحمر ابقى لها محرك
مصر ..
نهر النيل
خمسه وتسعين ألف ..
لا .. مش بالميل
حاسب براميل .. آه . عدى لقدام
لو كان يا حبيبتى .. آه لو كان
ح أضرب ٩ ف قلب ١٢ تطرح ٧ .
-- كان لازم تدرس ضرب الأرقام .
-- أعذرنى ..
أعرف اوطى دماغى وبس

وأغنى أحلى غنوة همس
وإن كنت ح أنام
باحلم بالشمس
أحلم بيها فدادين رجاله ..
ورجاله زراعين فدادين
أحلم بيها طوابير ما تنام
عرقانه بتدبح فى الخوف
-- إضرب .. ؟!
-- أعرف فى القسمه ..
وإدى نص القلب
إدينى بداله رغيـف.
-- دور له الخد الثانى
-- مش ضاربك .. ؟!
قال من كان .. آه يرميها .. يرمينا ..
وسابونا لمين
كل الفرسان.
-- كش .. ؟!

-- ما تقول الجد ؟!..

كل الفرسان

شربوا نخب المجد.

-- وأبوها كان يقول راح اجيب لك مصر

مسروره ومسروره فى منديل النصر

- كش -

زرع الفرسان الرمح ف خد الأسلفت

دار البلديه

كل الكلمات مكنوسه هناك

عبوها ف صناديق

- كش -

- مكشوفه.

- إلعبه .. ولأ الصناديق

مدرسه ال ..

ع الشط فيران بتوشوش رجلين الصياد

وشوش سمرا

لسه فاكرها " مديحة "

كان فى الشعر نحرور فى الشعر يقولوا ذهب
أيامها الأسفلت ما صادق القمر
شوق الجزمه وضلى فضل لى رقم
ترمس ..

كاس كونياك

أخضر

خص.

- مالك فيلك ح يموت م الحر

- فى الزمن الجاى ح يحيا الناس

فما بالك بالليل.

- إن شح القمح

ما تفكرش كثير

ياما الخنازير اتغدت ببطاطه

والسمك الإسود شرب القهوه

وف أسبانيا الدم ما كانش بيغرى الأسماك

"جاك" كان بيدور فى "الإسكرتا"

وف مصر

لو فيه أقمار تتباع
أنا كنت شريت لك دسّته
على رأيه
ح نطفى النور
" خايف أقول اللي ف قلبي ".
- إستتى
لسه مصرّه العصافير
تشرب من النبع الحالم
وتعدى على حبل الريح
- إيه الصور السريالى داهيا ..
بطّل تفاصيح يا فصيح
"جون" الإسود مات مقتول
"جاك" المسكين
لقيوه امبارح ميت جنب الصناديق ..
وف مصر ..
- كِش ..
- مات ؟؟

حكاية من ألف ليلة وليلة

كان الحبيب فارس ومنفى ع الحدود
تعزف على ضلعه الرياح
تحزن حبيبته ف سرها
يتأوه المصباح
تتأوه الكلمات
يعزف على ضلعه الشمال أنغام ..
ترجع وتلمس سدرها
يرمى السلام ..
تزرع دموعها خدها
والحزن موال الغرام

مولای ..
رجع الأسیر م الأسر مقطوف الجناح
وجوہ قلبه جوهره ونسر وحيثان
والسيف بجانبه إنحنى زى الصباح .
أما الغريبه فى الحكايه ..
ما لقوش فى قلبه
أى نقطة دم !؟

مرثية للأصحاب

... وتحت رايه البرق

جروا مراثى الحزن للفرسان

وتحت سور الحق

كتبوا المراثى للجبان

فى حنجرتى جلدوا الكلمه

ع الأسفلت ..

دبحوا نجمه

فوق الشجره ..

قتلوا نسمه

أنا شفت أحلامى فى الربيع ، دبلى

والجفاف زرق عيونها .. وتعبت

والعيون واقفه تبلى ما شبع

جوزت قلبى للرياح والبرق

وكان ليلتها دفته سكتت

كان القمر خائف فى شق
قدمت له أشعارى
وزهره من نهارى
وغنوه فوق أوتارى
قدمت له طاقتى ..
والجرح وبطاقتى
والحب وردائتى
وتحت سور الكذب
إتوقفت ساعتى
وقف الزمن يتأمل الفرسان
يا هلترى فرسان بحق
ولأنا الأعمى
هرب الجواب م الحق
مات الكلام فى الحلق
واتوقفت ساعتى
كان القمر يومها جبان

الفارس الأسير

- ١ -

يا وحدتى ..

ضهر القمر

بينخ فوق ضهر البلد

وشه الحزين لامس شفايف وحدتى

ملس على كتافى ورقد

يا وحدتى

وكنتى لسه باتولد

ليلة شتا كان مصرعى

من غير مابارز ع الحصان

وسقطت جنب السيف باغى دهشتى
سالت جنازه ع الطريق
ترسم لى بيتى وسكتى
- فارس صديق ؟!
فارس مطاردم الحصار .
وسقطت جنب السيف باغى للنهار
وللمدينه وللأميرة ف قصر أحلامها الرخام
ياوحدتى ..
وكننى لسه باتولد

أنا لسه باجرى فى الزحام
ضهر العذاب بينح فوق ضهر المحارب
سكر القمر
وشه الحزين لامس شفايفى فى انبهار
رفعت ايدى للقمر
- إياك تشارك فى الحصار !
- جيبوا الحرس .
كان أول الطعنات من الأصحاب

-٢-

أنزع عيوني لاجل اغطى رمش قلبك يامدينتى فى
الشتا.

وانزف فى سرى لوعتى فوق الطريق
من غير غطا.

واهرب بآخر حرف

وصلّى فى انتظار ..

بيجى نهار الصفح

وفكوا ضلعى م الحصار

واهرب بآخر حرف .. آخر حرف

وبين ضلوعى دوروا الأعوان

لقيوا اللى باقى م الأمير ، لجرح

- ٣ -

سبت العبايه شامه زرقا ..
فوق حيطان القصر
ونزلت فى السوق الحزين ..
استنشق الغربه

- إيرز خناجرك يا أمير .. ؟!
 - مش جاى لاجل اتقاتل مع الصحبان .
 - سبحانه واهب السيف لانسائنا الجبان .
- عضيت على قلبى المهان
ومشيت بعارى أعرضه
والسوق
تطويه عينيا وتفرده .

٧٠

- مشبوه .. ؟!

بقى ده أمير مشبوه .. ؟!

- مش جاي لاجل اتقاتل ..

ولا أرشد على الشجعان .

- سبحانه واهب السيف لبؤه

كان .. كان جبان

زى الأسير

تحجزنى نظرة عينهم السودا

مشبوه

أنا الأمير مشبوه

أنا اللي ياما مشيت ..

وراسى فى السما

أعلا من الأعلام

واستنشق الأحلام بطرف التوب

أنا الأمير

أنا الأسير

باغزل مصيرى فى الهروب .

المغربية

مروح المغربيه
والولاد
فوق شفافهم
البسمه فراحيه
والنجمه ع البيوت ..
نجمه صيف منديه
والقمر
بدر
على سدر المدينه، سبحته الكهرمانيه
وف ايده كام ورده
والنيل
فارد دراعه الطويل ..

حبة نغم فضه
والشوارع ناس وناس وناس
وف كل واحد كام بلد إحساس
آه يا بلدنا .. يا بلد تنباس
ياللى حاضنه فى القلوب الناس
الحب رامى زهرته الخضره على الأوتار
على الأوتار
غنى يا صاحبي
غنى للمدينه اللي سهرانه
لاجل ما يغيش النهار
عزفت ع الوتر
على ضحكة القناديل
نزل القمر
يشرب من شفايفنا فرحة المواويل
ويغزل معانا ضحكة الإنسان
ويمسح ..
دمعة الأحزان.

حكاية من سنة ١٩٥٦

ما طلّش فوق المدنه يدن للصلا
ولا النجوم غنت فى شباكها .. ولا ..
غزل النسيم غزله الرقيق فوق الشجر
كان القمر

يومها ببيكى ع الحدود
واتفرحضت كلمه "سعيده" كانت سعيده "بورسعيد"
لما صرخ "سامى" الصُغير
ضرحّت ونامت بورسعيد
صرخ القمر

وقعت كفوفه ع المداين والسفاين والمناره
وابتسم فى الغرب تمثال الحضاره
"سامى" فى كراساته كان يشخبط بالقلم رسما
ويحط فوق ضهر الهلال نجمات
وتحط عصفوره ملونه من ذوقه فوق مركب ورق
ما كانش يعرف يعنى إيه هيا الخساره
ولا يعنى إيه معنى غاره
لما المسا حطّ عيونيه ع البيوت حزمه أسى
الصيادين شافوا بين ذراعاه كراسات "سامى"
الصغير

فيها البارود .. بدل الهلال
والصرخه خنجر .. بدل موال
وابتسم فى الغرب تمثال الحضاره

سر

بعثرت عمرى فى بلاد الله
ودفنت آه
فى الصدر سر
فى الصدر كان ييموت إله
بعثرت عمرى ع الشفافى والورق
وفوق وسادتى الحلم جاييه من بلاد العرقانين
وتحت باطى جيل بينزف بالقلق
وتحت رمشى ألوف كتيره سهرانين
فى الصدر سر كان بيعيش إله

روما

... أنا لسه باجرى فى الطريق عطشان
رامى ظلالى تحت كرسى ف كل قهوه ع الحيطان
طالع سلام غربتى
نازل سلام وحدتى
ماشى بملابس غربتى
- قدامكو واحد تعرفوه ؟!
كل اللي كانوا ع الكراسى بيمضغوا الغريبه
ما تنفسوش
مع إن كان راديو الجيران مفتوح

رسمت قلبى ع الحيطان
رسمت كرسى ومدخنه وحبّة كلام
كل اللى كانوا ع الكراسى يعرفوا الرسمه
ما تنفسوش
مع إن كان راديو الجيران مفتوح

رسمت قلبى فوق حيطان أوده "محمد"
ولأن يا صحابى القمر مقتول
لبس الميدان طعم الجنازه .

رسمت قلبى فى الجنائن
رسمت عيل جنب بنت
بيقشروا الرمان
وبيسجدوا م الرعب لزرق للزمان .
- قد امكو رسمه تعرفوها ..!؟
كل اللى كانوا ع الكراسى بحلقوا بعيون نحاس

رسمت قلبى صحن فاضى فوق حيطان أوده
"محمد"

مع إن كان راديو الجيران يقول :
"يامه القمر ع الباب".
واتكرمشوا فوق الكراسى يهدهدوا الأحزان ..
مع إن كان راديو الجيران
بيرتل القرآن

كل اللى كانوا على الكراسى بيحلموا بالحب .
كان المزاج ملفوف مع النلمونت
اتتهدوا الجدعان والكلمه " لمحمد "
شال الستائر من على الشباك
دخل القمر
شايب ومتألم
واتكلموا والصوت حزين
زى الجرايد ما تتكلم
زى ما بتطلع عناوين المسا

" روما انقتل فيها العبيد "
كان الهوا أزرق عطيس
كان فى الحنك . .
الصمت مغناطيس
كان الكلام نايم فطيس
مع إن كان راديو الجيران حدد :
روما بتشغى بالعبيد

واحد .. من فرسان العصر

آه لو كان الرعد ..

يدخل قلبي

وامطرُ ف غيطان الحزن البرق

لو تتحول رؤيا الحزن رماد

لاجل الكذب اللي اتوج ملكه بدم الصدق يموت

أسروني لصوص الليل

هدموا برج البرق ف حنجرتي ومات الحرف

ودعت حبيبي جنب جدار من حزن

ودعكت عيوني ف كف الفجر

وباركني بأكبر ضحكه ما تعرفش الخوف

ومشيت ..

وأنا فاكِر آخر ورقه ف كراستي

آخر موضوع ع التخته ف عام ٥٥..

-: أكتب عن ٦٠% انهاروا

عن فرسان انداروا
زرعوا الرمح ف خد الأسفلت
عن فارس واحد..
غمس حرنه ف أسره باعصار الرفض
فى المنفى ..
والمنفى أد مدينه بأهاليها وخوفها
رسمت كفى شواهد قبر ف جوفها
رسمت عيني ف كراستى
موضوع الإنشاء ف عام ٦٥ :
- أكتب عن إنسان العصر !?
ولانى نسيت الكلمات
وما عدت أعرف اميز بين الأصوات
ولا بين الأسماء
ولا بين المنفى أو قمر المنفى ..
إن كان دا رغيف أو وش حبيبي
فضلت الصمت

جزء من مذكرات مجهولة

يوم السبت ..
حط البحر شباكهُ وشباكهُ رماه ع الشط
داست على قلبه الألغام
وسفينه بتغسل توبها المتقوب فى الرمل
- شيلنى ياعم ..
الموجه اتحنن بالدم

يوم الحد..
ولا حد بيعرف حد
والطلقات
ما كانيتش تميز حد

الأتنين ..
ماطلعش السريدين م البحر
وسفينة الصياد إتأوب فيها الدم
وانكوم هم ..
- شيلنى ياعم
أنا أدّ ميتين ونا أدّ الأرض
ودى أرضى وعرضى جريح

يوم الثلاث
الأمهات والأبهاث
فى قلبهم ..
الرعب بات
والصبح لاخضر
من عليهم ..
عيط .. وفات
والجميع ..
لاجل يكبر الربيع
لاجل ييجى يوم قريب للخلاص
بيحوشوا الصرخه طلقه من الرصاص

يوم الأربع
الصبح مدمع
سكت المدفع
ما سكتش المدفع

كروان ..

كروان .. يا كروان .. يا كروان
طاير تشد ضفاير النسمه
وضحكك من ضحكة النجمه
فارد جناحك وانت بتغنى
صوتك قمر فرحان ومتحنى
غنى يا حبيبى :
فتح البنات شباكهم أبو ستاره سهرانه
وقالوا آه يا ليلى الآهه حرانه
غنى لنا ونسينا
ونسنا ورسينا
وقرب م الغريب فى وحدته

ونس اللي غايبه سكته
راح ياخذك الليل الحزين ..
أبو النجوم العطشانيين ..
أبو القمر سهران بيتألم
يا هلترى من إيه .. ما تتكلم
ورفرف على بيوت المدينه
ونس كل فرحه تتام حزينه
عدى الليالى أم الحكاوى الدبلانيين .
عدى غيطانا أم السنابل عطشانيين
غنى لقمرنا أبو العيون النعسانين
ونادى ع الغريب ما تقولش آه
ونس اللي صاحى للحياه
ما تقولش آه
ما تقولش آه
غنى بقلبك للحياه
يا كروان

راجل غريب .. جاى يغنى عندنا

- ١ -

ع الأرصفه ..
حزن الأنبيا ماشى ببقرا فى الجرنان
وع الأسفلت ..
داست الـ "فورد" الطويله ..
فوق جراح إنسان
وفى القهاوى
"الكومى" البطل .. مش الأخبار
واتنهد القلب اللي مكوى ..
وانزوى تحت النهار

-٢-

ماشيه ع البحور بشعور محنيّه
بالشمس فى كفوفها حرير أسمر
والفجر فى عيونها
ماشيه ع الشطوط بتلم فى جروحها
وتلم ضحكاتها
ماشيه لكن الحزن واقف فى سكتها
والسنين ..
تايهه فى نظرتها .
- ايه اللي طالع يا عروسة البحر .. ؟!
كان ردها الصمت واقف ناس فى دمعته.

كلمه ف دنيا بتغرّب
وكلمه ثانيه بتقرّب
ودراعه زى الجسر فى ليل العواصف
واتمايلت الكلمه الشجاعه ..
ع الشفايف بندقيه
إيده ع الزناد
عينه ع البلاد
هب الرصاص ..
واتبحترت ع الرمل كلمه " أحبك " ..
ياللى عيونك شمس كانت والميعاد

رسائل قصيرة ..

إلى
العصفور الأسمر

غنّى الليل في ضلوعي
نزلت كل دموعي
نزلت فوق أسوار الرؤيا وباش الحزن
يا حبيبتي ..
هاتي إيدك نهرب خلف الأسوار

الليل مركبنا
والبحر كلامنا .. وملاحنا ..
نجم صغير أد العصفور

ورقَيّ زى العصفور

ويحب النور

وإن شاف الموج محتار م الرعب

يطلع ويغنى .. يصحى ألف نهار

يا حبيبتي..

هاتى إيدك نهرب خلف الأسوار

دائمًا بأحلم بإيدينا بتحضن بعض

واحنا بنجرى وسط الشارع ..

وعيوناه فوانيس م الورد

والمطر نازل سلالمه .

والقمر حاضن صحابه

والنجم واقف ع الجدار

يا حبيبتي ..

هاتى أيدك نهرب خلف الأسوار

أنا فى الأوده البردانه ..

راسى على كتفك ..

وانتى .. فى اللحظة الدقيانه

راسك على كتفى
يا حبيبتي ..
هاتى إيدك نهرب خلف الأسوار

شفتك فى عيون الناس
وشافونى الناس فى عنيكى
طلع الليل يتن
سكر الصبح المحتار
يا حبيبتي ..
هاتى إيدك نهرب خلف الأسوار

المطر حرك إيديه ..
المطر جوايا .
المطر حرك عينيه .
المطر جوايا .
المطر غرقنى ليه ..
المطر جوايا ...
خدنى بقلبي

سلمنى للمسافات
وفضلت ماشى وانتى جنبى
وتنهنا فى الحكايات

واحشائى.

.....
الراديو والصوت الدافى
الصور اللى بيجرى فيها اللون هربان م الضل
الاسود

.. والنظره الصفصافى
والإيد اللى بتحمى الورد الأبيض

.....
طار العصفور الأسمر
حط العصور الأسمر
وشفايفه ..

حاضنه الدنيا الوردية
الفرع الأخضر
إتحنى بطعم البرد
وفضلت ماشى وانتى جنبى
وتنهنا فى الحكايات

غاب القمر

غاب القمر يابن عمى
يالاً روحنى
د النسمة آخر الليل ..
بتقوت وتجرحنى
والصوت دبل فى الخلا
والليل ما عاد له دليل
نعس الفضاء
واتملا قلبى بنجوم الليل
طار النسيم بالشوق لما كلمتك
لمس النسيم توبى برمش غنيوتك

الليل ووحدى ووحذك
سايبين هوانا وحيد
فين الحواديت وفين ..
سهراتنا تحت الضى
بعد القمر يا حبيبى ما غاب

ما قال لنا جأى
خوفى من الضلمه تتوهنى وانت بعيد

ضحك الهوا حواليك .
واتمايلت النجمات
سلم على شعرى ..
ورماه عليك حكايات
مشوارنا همسه ..
وضحكه شاردة فى الفضاء
مشوارنا خطوه وعمرها ما بتتقضى
بعث القمر مرسال
بعث النجوم موال
وخطوتك وانت جنبى شوق يفرحنى
غاب القمر يا بن عمى
يالاً روحنى

اتجوزنا ع الحيطان

على حيطان الجيران

فوق خشب الببيان

رسمنا زمان

رسمايه بألوان

رسمت نفسى عروسه

وواخذنى ع الحصان

وطاير فى الشوارع

وساقينى م الحنان

ع الورد نقشنا صورتنا
وشفايف الحب نادتنا
وطيور الشوق عرفتنا
والناس .. والليل .. والحاره ..
والنجمه الخضره أماره

وع الحيطان اتجوزنا.
ويمكن ع الحصان
والحضرن كان جنتنا
والنسمه كات ألحان
واهو راحت الأيام
وكبرنا فى الأيام

ولسه ع الحيطان
فى الرسمه صغيرين
وبرضه بالكلام
بنوشوش الأحلام
ولسه ع الحيطان ..
أنا وانت مرسومين

رسمت نفسى عروسه
واخذنى ع الحصان
وطاير فى الشوارع
وساقينى م الحنان

فهرس

٥	فى الحب .. والحكمة
٧	الكلمات
٩	راجل غريب كان يحلم بالمستقبل
١٢	الربيع
١٩	كلمات منسية من شوارع القاهرة
٢٥	تراثيل .. من غير معنى
٢٩	عشائك
٣١	١٩٦٤
٣٣	دراعا إله
٣٥	رسائل فاقدة الوعي
٤٥	مونولوج راجل له ذكرى حزينة
٦٣	حكاية من ألف ليلة وليلة
٦٥	مرثية للأصحاب
٦٧	الفارس الأثير
٧٣	المغربية
٧٥	حكاية من سنة ١٩٥٦
٧٧	سر
٧٩	روما
٨٣	واحد .. من فرسان العصر
٨٥	جزء من مذكرات مجهولة
٨٩	كروان ..
٩١	راجل غريب ... جاى يغنى عندنا
٩٥	رسائل قصيرة إلى العصفور الأسمر
٩٩	غاب القمر
١٠١	اتجوزنا على الحيطان